

M146: Monatsregeln für die Wahl eines Freundes

- 1,1 Januarius dicit . ob sich Aquarius enthabē
1,2 aller vriuntscheftē ganc dū abe .
1,3 wante swen dū dir danne kiuses .
1,4 vile schiere dū in verliuses .
- 2,1 Februarius dicit . sô sich enthabent Pisces .
2,2 sô vlîz dū dich [des]
2,3 daz dū dir einen gesellen
2,4 kieses zuo heimelîchen dingen .
2,5 wante daz zeichen ist vile guot .
2,6 alle vrôuwede dâ mite gêt dir zuo .
- 3,1 Martius dicit nim decheinen vriunt in Ariete .
3,2 wante ir scheidet iuch mit unmînnen .
- 4,1 Aprilis dicit . sô dū vindes daz signum in Tauro .
4,2 sô ne scholt dū nieht erwînden
4,3 êr dū dir einen vriunt gewînnēs .
4,4 daz zeichen hât guot anegenge .
4,5 unde michel bezzer ende . Maius dicit
- 5,1 vindes dū si in Geminis
5,2 sô solt dū sîn vile gewis .
5,3 daz dir heil volget . zuo den dingen
5,4 dâ man vriunt sol mite gewinnen .
5,5 iu volget heil unde êre .
5,6 unde scheidet sich niemer mêre .
- 6,1 Junius dicit ob dū si in Cancro vindes
6,2 daz lâ dir sîn daz minnest .
6,3 swen dū dir danne kiuses .
6,4 von nîde unde von hazze dū in verliuses .
- 7,1 Julius dicit . sô dū si vindes in Leone .
7,2 sô ne beite niemer
7,3 einen vriunt kius dū dir drâte .
7,4 diu minne ist stætic .

- 8,1 Augustus dicit . vindes dû si in Virgine .
8,2 sô nim dir einen vriunt drâte .
8,3 êr sich daz zeichen umbekêre
8,4 dir volget minne unde êre .
- 9,1 September dicit . vindes dû si in Libra
9,2 aller vriuntscheft solt dû danne erwinden .
9,3 von zorne müezet ir iuch scheiden .
9,4 daz zeichen solt dû vermîden . October dicit .
- 10,1 vindes dû si in Scorpione .
10,2 swelichen vriunt dû danne gewinnes [mêre]
10,3 der ist dir holt durch gâbe .
10,4 sô abe dû danne ime des abe gês .
10,5 diu minne scheidet sich sâr .
10,6 sô getân ist des zeichenes natura .
- 11,1 November dicit . sô si danne in Sagittario stêt .
11,2 alliu vröuwede dir zuo gêt .
11,3 sô île vile snelle
11,4 kius dir einen gesellen .